

Колхозин агитатормудин кӧдлмшӓс

Элстин эргид бӓӓх „Страна Советов“ колхозин эклц партийн организацин агитатормуд Алдр Октябрин 40-ч джидлин ӧбниг тосдж, олин колхозникуд болн механизатормуд дунд политическ цӓӓлгъврин кӧдлмш делгрӓлдж, соцдӧрлдӓнд тедниг шунмгъагъар орцулад, колхозин производствен зура кӓцӓлгънд, дилвр тетклгънд дӧнъ-нӧкдӓн кӓргдж йовцхана.

Эклц партийн организац агитатормудин зерглӓнд, олин дунд цӓӓлгъврин кӧдлмш кедж чадх медрлтӓ, дамшлтта улс орулдж, элин дунд тасрлтан угагъар сургъмджин кӧдлмш кенӓ. Агитатормудиг даранданднь хурагъад, семинар кегъӓд, кӓцӓх тодрха тӧрмӓдинь кедж ӧгӓд, ягъдж кесин сӓн болхинь олар кӓӓндвр кедж зӧвшӓлцхӓнӓ.

Намрин тӓрӓ тӓрлгън эклхин ӧмн агитатормудин семинар хурагдснд—агитатормуд кӓцӓх тодрха кӧдлмш кӓӓндгдв. Энӓнӓ даруднь бригадсар цӓӓлгъврин кӧдлмш зӧвӓр ясрв. Колхозд хӧр гар агитатормуд ода кӧдлдж йовна. Элин дунд сӓӓнӓр даалгъвран кӓцӓдж йовихахнь багъ биш.

КПСС-н член, хойрдгч комплексн бригадин бригадир ӓр Г. Дзюба, эврӓннь бригадан гардсн деерӓн, агитатор болдж кӧдлнӓ. Партийн организацин ӧг-

син даалгъвринг эн килмджтӓ, шунмгъа кевӓр кӓцӓнӓ. Партийн болн правительствин эрки чинртӓ шидврмӓдин, мана олин-ӓмтнӓ кӓч-кӧлснӓ дилврмӓдин, тангъчнин малчирин кӓцврмӓдин болн нань-чигн тӧрмӓдин тускар кӓӓндвр кехдӓн, газет умшдж ӧглгъндӓн ӓр Дзюба кӧдлмшин хоорид гардг сул цагиг сӓӓнӓр олзлдж, колхозникудт болн механизатормудт цӓӓлгъвр делгӓ кенӓ. Ӧдр таслгго гилтӓ эн ингдж кӧдлнӓ. Дакад болхла „боевой листок“ болн соцдӧрлдӓнӓ бюллетень гаргългънд бас орцна.

Олин-дунд политическ цӓӓлгъвр кегддж, соцдӧрлдӓн делгӓ болдж йовхин ашднь бригадин кӧдлмшт дилвр кӓцгдснь ӓзгдджӓнӓ. Бригад 5 хонгин дотр 678 гектар газрт намрин тӓрӓ тӓрлж дуусв. Эн мет дӧрвдгч комплексн бригадт чигн намрин тӓрӓ тӓрлгън хурдар, 650 гектар газрт тӓргдлж дуусгдв.

Колхозин агитатормуд дунд шунмгъа кевӓр, партийн организацин даалгъвр кӓцӓдж йовцхана гидж ӓӓрмӓд Т. Гапот, И. Обшаров, И. Попенко, Мария Попенко, Э. Буваев, В. Коробейникова, В. Урубкина—ӓдниг бас заах кергтӓ.

А. ХУЛХАЧИНОВ,
КПСС-н балгъсна комитетин
инструктор.